



SAKSFRAMLEGG

Sakshandsamar: Karianne Kayser	Arkivkode: FA-A30
Arkivsaksnr: 18/1611	Løpenr: 22/1102
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Kommunestyret	24.02.2022	010/2022

Tidlegare oppstart for elevar i kulturskulen

24.02.2022 Kommunestyret:

Handsaming i møtet:

Jon Magne Borgevik (Ap) spurde om rådmannen sitt framlegg inneber at ei eventuell styrking av kulturavdelinga sitt budsjett skal finansierast med midlar frå disposisjonsfondet. Sakshandsamar Meline Heimdal Haugland stadfesta dette.

Rådmannen sitt framlegg vart samrøystes vedteke.

KS- 010/2022 Vedtak:

Kulturskulen sitt budsjett for skuleåret 2022 vert styrka med kr 20 000,- slik at elevar som ønskjer å spela korpsinstrument i kulturskulen kan starta frå hausten dei går i 2.klasse. Det vert lagt opp til at dette tiltaket vert finansiert innanfor kulturavdelinga si eiga ramme. Dersom det viser seg at kulturavdelinga ikkje klarar å ta kostnadane innafor eiga ramme, vert kulturavdelinga sitt budsjett styrka med kr 20 000 ved 2. tertial.

Rådmannen sitt framlegg til vedtak:

Kulturskulen sitt budsjett for skuleåret 2022 vert styrka med kr 20 000,- slik at elevar som ønskjer å spela korpsinstrument i kulturskulen kan starta frå hausten dei går i 2.klasse. Det vert lagt opp til at dette tiltaket vert finansiert innanfor kulturavdelinga si eiga ramme. Dersom det viser seg at kulturavdelinga ikkje klarar å ta kostnadane innafor eiga ramme, vert kulturavdelinga sitt budsjett styrka med kr 20 000 ved 2. tertial.

Dokument som ikkje er vedlagt:

Brev frå leiar i Samnanger skulemusikklag datert 30.01.22.

Rammeplan for Samnanger kulturskule, vedteken av kommunestyret 15.12.16.

Kva saka gjeld:

Det har vore vanleg praksis i Samnanger kulturskule at elevar kan få plass i kulturskulen frå dei går i 3. klasse dersom dei ønskjer å spele korpsinstrument (messinginstrument, treblåsarinstrument og

slagverk). Når det gjeld andre instrument og fag i kulturskulen (piano, gitar, song og teater) kan dei starte i 4. klasse.

Samnanger kulturskule har eit svært godt samarbeid med Samnanger Skulemusikklag (SSML). Dei kjøper timar til dirigentar og instruktørar gjennom kulturskulen, og borna som går i SSML får instrumentalundervisning av dei same lærarane/dirigentane i kulturskulen. Skulemusikken har hatt ei svært positiv utvikling dei siste 10 åra, og dei ligg no i 2. divisjon for janitsjarkorps i Noreg.

SSML har gjennom dei siste åra hatt ein stor auke i sitt aktivitets- og ambisjonsnivå. Både SSML og kulturskulen ser at ved å sette oppstart til 3. klasse i kulturskulen er dette seint i forhold til andre fritidsaktivitetar. Borna har allereie starta opp med andre fritidsaktivitetar og har ikkje plass eller tid til kulturskulen og skulemusikken.

Det er derfor eit ønske at oppstart for undervisning i korpsinstrument kan starta opp når elevane startar i 2. klasse. Dersom dette fungerer godt, kan ein vurdere neste år om oppstart for andre fag og instrument skal bli senka frå 4. til 3. klasse.

Vurderingar og konsekvensar:

Ved å senka innmelding for undervisning på korpsinstrument frå 3. til 2. klasse vil ein i april 2022 kunne få søkjarar for skuleåret 2022/2023 frå både 2. og 3. klasse. Kulturskulen vil mellombels for skuleåret 2022/2023 få noko auke i lærarressursen. Det er vanskeleg å seie kor mange elevar frå 2. trinn som ønskjer å søka. Dersom det gjeld til dømes 5 nye elevar i 2. klasse, vil dette utgjere 9,6% mellombels lærarstilling for skuleåret 2022/2023. Dette vil kunne utgjere ein meirkostnad på omtrent kr 57 600,- rekna ut i frå ei gjennomsnittleg årsløn på kr 600 000,-. Elevkontingent for skuleåret 2022/2023 er kr 2 780,- pr elev. Dette utgjør ei inntekt på kr 13 900,- for fem elevar. Det reelle meirkostnadane for fem elevar vert kr 43 700,-. Dersom det er ledig elevtid innanfor den ordinære undervisninga, vert desse elevplassane først fylt opp og utgiftene vil bli lågare enn kr 43 700,-.

Med dette scenariet med tal på elevar skuleåret 2022/2023, så vil haustverknaden av dette vera om lag kr 20 000,- og om lag kr 20 000,- for vårhalvåret 2023. Nøyaktig kostnad for 2022 vil verta klarlagt etter innkomne søknader og tildeling av elevplassar. Denne summen vert ein meir sikker kostnad. Det er ikkje budsjetttert med meirkostnadane i 2022. Om mogleg vil kulturavdelinga ta kostnadane eller delar av kostnadane innafor ramma. For vårhalvåret 2023 greier kulturskulen å dekkja utgiftene innafor eiga budsjettamme.